

Regel mit dem abfähen bey dem C. 77/ wo der Puncten 100. ist/  
vnd ruck sy nach dem oberen gesims/ so findest du in der auffrechtē  
regel D. 40. puncten/ vnd ist der Thurn hoch/ 140. schuch von ei-  
nem gesims zu dem anderen / so zell vom A. gegen dem C. wo 40.  
puncten ist/ vnd sprich/ es ist 140. schuch/ vnd weiß du auff den 80.  
puncten kumpst/ so ist es zwey mahl 40. vnd gibt 280. Schuch/ so  
hast du noch 20. puncten/ die gend 70. schuch / gibt zusammen 350.  
so sprichstu daß du von dem Thurn standist 350. schuch/ ist in der  
Figur mit N. O. Q. verzeichnet.

## Das zehend Capittel.

Wie man durch einen Spieß so im Fäld stadit kan  
mäßen wie weit einer daruon stahit.

**S**teck ein Spieß oder ein ander maß in dem fäld auffrechtē  
in die Erden/ vnd du ihn zu vor gemäßen hast/ vnd ist 18.  
schuch hoch über die erden / demnach gang von dem spieß  
so weit als du wilt (doch daß du zu dem spieß vnden vnd oben sä-  
hen mögist) vnd steck den stecken in die erden bey dem VV. mit dem  
steffe/ vnd strub das Instrument daran / demnach ruck die Regel  
mit dem buchstaben B. gegen dem spieß zu dem buchstaben S. so in  
der Figur auffgerissen ist / darnach richt die Regel mit dem buch-  
staben D. auffrecht in den Senckel/ vnd hab sorg daß das Instru-  
ment nit verruckt werd/ demnach leg die regel mit dem buchstaben  
C. da 100. in verzeichnet ist / vnd lug durch die abfähen zu der hö-  
che des spieß zu dem buchstaben T. vnd lug in der auffrechten Re-  
gel was die regel mit dem abfähen für ein zahl abschneyde/ die selb-  
big zahl merck/ du hast funden von dem A. gegen dem D. 18. grad  
oder puncten so die regel hat abgeschnitten/ demnach zell von dem  
A. gegen dem C. wie du die 18. zelt hast/ so findest du dz du von dem  
Spieß stahst 100. Schuch.

E ij